



Réponse commune de Monsieur le ministre de l'Économie, des PME, de l'Énergie et du Tourisme, Lex Delles, de Monsieur le Ministre de l'Environnement, du Climat et de la Biodiversité, Serge Wilmes, de Madame la ministre de la Santé et de la Sécurité sociale, Martine Deprez et de Monsieur le ministre des Affaires étrangères et du Commerce extérieur, Xavier Bettel, à la question parlementaire n°1919 du 10 février 2025 de Monsieur le député Sven Clement au sujet de la centrale nucléaire de Cattenom

Der Lëtzebuerger Regierung ass net matgedeelt ginn, datt zu Cattenom e neie Reakter kéint gebaut ginn.

De françaische *Projet de Programmation pluriannuelle de l'énergie (2025-2030, 2031-2035)* mécht keng Referenz op en eventuellen EPR-Bau zu Cattenom. D'Sitte vu Penly, Gravelines a Bugey ginn vun der françaischer Regierung ausdrécklech genannt : « *EDF porte un programme de construction de 6 nouveaux réacteurs nucléaires de type EPR2, à raison de deux réacteurs sur le site de Penly, deux sur le site de Gravelines et deux réacteurs sur le site de Bugey. L'Etat confirme son soutien à ce programme et s'inscrit dans la perspective d'une décision finale d'investissement par le Conseil d'administration d'EDF en vue de son lancement au plus tard durant l'année 2026.* ».

An der Äntwert vum 22. Oktober 2024 op d'parlamentaresch Fro 1220 vun der Deputéierte Joëlle Welfring gouf am Detail duergeluecht wéi an a wéi enge Gremien et Echangë mat der françaischer Regierung iwwert d'Atomkraaftwierk Cattenom gëtt. D'Regierung diskutéiert am Kader vun hirem reegelméissegem Austausch mat de françaischen Autoritéite systematesch dës Themen. D'Commission mixte franco-luxembourgeoise de sécurité nucléaire erlaabt Lëtzebuerg an engem Austausch mat Frankräich ze stoen an d'Situatioun vum Atomkraaftwierk Cattenom reegelméisseg unzeschwätzen.

Wéi am Koalitiounsaccord 2023-2028 festgehal, hält d'Regierung un der Ëmsetzung vum Nationale Plang fir Energie a Klima (PNEC) fest, deen ambitiéis Ziler an de Beräicher erneierbar Energie festleet, ënner anerem duerch de konsequente Ausbau vun der Wandenergie an der Solarenergie.

Well de Lëtzebuerger Stroumresau haaptsächlech iwwer Däitschland alimentéiert gëtt, a Lëtzebuerg zesumme mat Däitschland an enger Marchészon ass, ass dee Perimeter primär fir d'Lëtzebuerger Versuergungssituatioun relevant. Datt d'Versuergungssécherheet an der Groussregioun net vum Atomkraaftwierk Cattenom ofhängeg ass, gouf 2021 an enger Etude vum Däitschen Ingenieurbureau Consentec duergeluecht.¹

Luxembourg, le 13/03/2025

Le ministre de l'Économie, des PME,
de l'Énergie et du Tourisme,

(s.) Lex Delles

¹ <https://consentec.de/publikation/auswirkungen-einer-abschaltung-des-kernkraftwerks-cattenom-auf-die-versorgungssicherheit-in-der-region/>